

PEMBERITAHU PERTANYAAN DEWAN RAKYAT

PERTANYAAN : BUKAN LISAN

**DARIPADA : DATO' RAJA KAMARUL
BAHRIN SHAH
(KUALA TERENGGANU)**

SOALAN:

Minta **MENTERI PERTAHANAN** menyatakan berapa orangkah anggota tentera Malaysia bertempat di Arab Saudi daripada tahun 2015 hingga Januari 2017 dan apakah tugas-tugas mereka.

JAWAPAN:

Operasi Siap Sedia Evakuasi Rakyat Malaysia di Yaman telah bermula pada 10 Mei 2015. Dalam tempoh tersebut, sebanyak 7 siri penugasan trup Angkatan Tentera Malaysia (ATM) telah dan sedang dilaksanakan. Setiap siri pengoperasian melibatkan antara 81 hingga 89 orang pegawai dan anggota Lain-lain Pangkat, dan ditempatkan di Prince Sultan Air Base (PSAB), Arab Saudi.

SOALAN (66)

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : BERTULIS

**DARIPADA : YB DATO' RAJA KAMARUL BAHRIN SHAH
[KUALA TERENGGANU]**

SOALAN :

YB DATO' RAJA KAMARUL BAHRIN SHAH [KUALA TERENGGANU]
minta **PERDANA MENTERI** menyatakan status Projek "East Coast Rail
Lane" dan syarikat-syarikat yang akan terlibat.

JAWAPAN :-

Tuan Yang di-Pertua,

Untuk makluman Ahli Yang Berhormat, *East Coast Rail Link* (ECRL) merupakan projek infrastruktur yang penting bagi Koridor Ekonomi Pantai Timur (ECER) yang akan menghubungkan Pantai Timur dan Lembah Klang. Pelaksanaan ECRL akan menjadi pemangkin transformasi untuk negeri-negeri pantai Timur di Semenanjung dan bakal merangsangkan lagi pertumbuhan sosio ekonomi, serta memberi manfaat kepada rakyat secara keseluruhannya.

Semasa lawatan rasmi delegasi Malaysia ke Republik Rakyat China (RRC) pada Oktober 2016, beberapa perkara telah dibincangkan bagi meningkatkan pelaburan dan juga kerjasama bilateral berterusan dengan Kerajaan China. Dalam rundingan itu, kedua-dua Kerajaan telah mencapai kata sepakat supaya projek ECRL ini dilaksanakan sebagai inisiatif projek *Government-to-Government* (G2G) antara Kerajaan China dan Malaysia.

Selain itu dan mustahak untuk pengetahuan Ahli Yang Berhormat, Kerajaan China turut mengemukakan tawaran pakej kewangan yang

menarik dan memberi kelebihan kepada Malaysia. Bagi membolehkan Malaysia mendapat terma kewangan yang terbaik ini, dalam rundingan G2G berkenaan, syarikat pembinaan terbesar milik Negara China iaitu China Communications Construction Company (CCCC) telah dinominasi oleh Kerajaan negara China untuk melaksanakan projek ECRL.

Pemilikan, pengurusan dan operasi ECRL akan secara sepenuhnya di kawal oleh Malaysia. Bagi projek ini, syarikat khusus yang dipertanggungjawabkan ke atas pembangunan projek iaitu Malaysia Rail Link Sdn Bhd yang telah ditubuhkan di bawah Menteri Kewangan DiPerbadankan (MKD). Kementerian Kewangan melalui Malaysia Rail Link Sdn Bhd akan memperhalusi syarat-syarat perjanjian projek dan perjanjian pembiayaan.

Kerajaan sentiasa mengambil pendekatan telus dan terbuka mengenai pelaksanaan projek yang melibatkan kepentingan awam. Melalui Suruhanjaya Pengangkutan Awam Darat (SPAD), Sesi Pemeriksaan Awam (*Public Inspection*) berkaitan projek ECRL ini telah dilancarkan pada 8 Mac 2017 oleh YAB Perdana Menteri. Sesi ini akan mempamerkan pertamanya, cadangan laluan kereta api dari Wakaf Bharu ke Terminal Pengangkutan Bersepadu (ITT) Gombak yang mempunyai 23 stesen di sepanjang landasan. Kedua, lokasi stesen

pertukaran dengan landasan kereta api sedia ada di Semenanjung Malaysia dan ketiganya, lain-lain ciri projek ECRL.

Selain daripada ibu pejabat SPAD, sesi Pemeriksaan Awam akan turut diadakan di 38 lokasi yang boleh dikunjungi orang ramai, termasuk Pejabat-pejabat Daerah di Kota Bharu, Tumpat, Bachok, Pasir Putih, Besut, Setiu, Kuala Terengganu, Hulu Terengganu, Marang, Kemaman, Dungun, Kuantan, Maran, Temerloh dan Bentong mulai 8 Mac 2017 sehingga 5 Jun 2017.

Pameran ini merupakan keperluan di bawah Seksyen 84 Akta Pengangkutan Awam Darat 2010, yang menyatakan bahawa satu forum maklum balas awam perlu diadakan bagi setiap projek rel yang dicadangkan. Pameran ini juga bertujuan bagi memaklumkan kepada orang ramai mengenai manfaat sosio-ekonomi projek ECRL kepada negara.

Sekian, terima kasih.

Mac 2017

**PEMBERITAHUAN PERTANYAAN
DEWAN RAKYAT**

PERTANYAAN : BAGI BUKAN JAWAB LISAN

**DARIPADA : DATO' RAJA KAMARUL BAHRIN SHAH
[KUALA TERENGGANU]**

SOALAN : 67

Dato' Raja Kamarul Bahrin Shah [Kuala Terengganu] minta **MENTERI PENGANGKUTAN** menyatakan syarikat asing manakah akan membina dan mengurus pembinaan kemudahan pelabuhan baru di Johor Bahru, Melaka, Pelabuhan Klang, Kuantan, Bagan Datoh dan Pulau Pinang.

JAWAPAN

Ahli Yang Berhormat,

Pada ketika ini, pengendalian operasi di pelabuhan-pelabuhan persekutuan diswastakan dan dikendalikan oleh syarikat tempatan melalui perjanjian konsesi. Buat masa ini, Kementerian Pengangkutan tidak menerima sebarang permohonan daripada syarikat asing untuk membina dan mengurus pelabuhan baru di Johor Bahru, Melaka, Pelabuhan Klang, Kuantan, Bagan Datoh dan Pulau Pinang.